

**PEMBERITAHUAN PERTANYAAN DEWAN RAKYAT
JAWAPAN OLEH YB DATUK DR. S. SUBRAMANIAM
MENTERI KESIHATAN MALAYSIA**

**PERTANYAAN : BUKAN LISAN
DARIPADA : YB TUAN FONG KUI LUN [BUKIT BINTANG]
SOALAN :**

YB TUAN FONG KUI LUN [BUKIT BINTANG] minta **MENTERI KESIHATAN** menyatakan bilangan kes deman denggi setakat Februari 2015 dan sebab-sebab ia gagal dicegah dan langkah-langkah pencegahan yang dijalankan.

Tuan Yang di-Pertua,

Pada tahun 2014, sebanyak 108,698 kes pada 2014 dengan 215 kematian dilaporkan. Manakala bagi tahun 2015 dari Januari hingga 28 Februari, jumlah kes dilaporkan di seluruh negara adalah 23,966 kes, berbanding 16,383 kes bagi tempoh yang sama tahun 2014, peningkatan sebanyak 46.3% (7,583kes). Bagi tempoh yang sama, jumlah kematian Denggi dilaporkan adalah 62 kematian, berbanding 29 kematian bagi tempoh yang sama tahun 2014, meningkat sebanyak 33 kematian (114%). Bagi 2 minggu kebelakangan ini iaitu pada minggu 7 dan 8, terdapat tren penurunan kes denggi mingguan yang dilaporkan di mana jumlah kes adalah kurang dari 3,000 kes seminggu.

Tren kes denggi yang dilaporkan ialah pada tahun 2008 sebanyak 49,335 kes dengan 112 kematian, pada tahun 2009 sebanyak 41,486 kes dengan 88 kematian, tahun 2010 sebanyak 46,171 dengan 134 kematian, tahun 2011 sebanyak 19,884 kes dengan 36 kematian, pada tahun 2012 sebanyak 21,900 kes dengan 35 kematian, tahun 2013 sebanyak 43,346 kes dengan 92 kematian dan pada tahun 2014 sebanyak 108,698 kes dengan 215 kematian.

Tren taburan kes kematian denggi dari 2008 hingga 2014 mengikut umur dan kumpulan umur tidak menunjukkan banyak perubahan. Contohnya pada tahun 2014 taburan kes kematian mengikut jantina adalah didapati 52% adalah dikalangan wanita dan 48 % adalah lelaki. Manakala 60 hingga 70% daripada kes dan kematian berlaku di kalangan populasi yang produktif iaitu berusia diantara 20 hingga 59 tahun.

Pelbagai faktor yang menyebabkan berlaku peningkatan kes denggi pada masa ini iaitu seperti berikut:

1. Faktor persekitaran yang tidak bersih dan menyumbang kepada tempat-tempat pembiakan Aedes seperti bekas polisterine, bekas plastik dan tayar terpakai.
2. Pergerakan manusia yang tidak terbatas dan lebih meluas terutamanya bagi pesakit yang telah dijangkiti virus denggi akan mudah menyebarkan virus ke tempat lain apabila pesakit melawat ke tempat baru.

3. Berlaku perubahan serotype denggi (serotype shift) dalam komuniti dan menyebabkan peningkatan kes serta kematian denggi. Pada tahun 2014 saja berlaku 2 kali serotype shift iaitu pada bulan Mac dan bulan Ogos dan dari pemerhatian KKM selepas 4 bulan serotype shift berlaku maka ianya menyebabkan kes dan kematian Denggi berlaku.
4. Faktor cuaca contohnya musim hujan dimana bekas yang boleh menampung air akan menjadi tempat pembiakan Aedes menyebabkan populasi Aedes meningkat seterusnya menyebarkan virus denggi.
5. Tabiat masyarakat yang membuang sampah merata rata dan tidak mengurus sampah dengan baik. Selain itu, kurangnya kesedaran masyarakat untuk melaksanakan tindakan pencegahan seperti membersihkan persekitaran mereka dan melaksanakan aktiviti "cari dan musnah" tempat pembiakan Aedes setiap minggu.
6. Selain faktor yang tersebut diatas, pada tahun 2014 KKM telah memperkukuhkan kaedah mendiagnosa kes denggi iaitu melaksanakan penggunaan ujian Combo Rapid Test Kit di semua negeri, bagi mengesahkan kes denggi yang dilaporkan. Secara tidak langsung lebih banyak kes denggi yang dikesan kerana pada peringkat awal kes denggi adalah sukar dibezakan dengan penyakit demam yang lain.

Bagi mengurangkan kejadian kes dan kematian denggi, Kementerian Kesihatan telah melaksanakan antara perkara perkara berikut:

- i. Mengaktifkan semula Mesyuarat Pasukan Petugas Khas Denggi yang dipengerusi kan oleh Ketua Pengarah Kesihatan, secara bersepadu melalui kerjasama enam (6) Kementerian iaitu:
- Kementerian Kesejahteraan Bandar, Perumahan dan Kerajaan Tempatan;
 - Kementerian Kerja Raya;
 - Kementerian Sumber Manusia;
 - Kementerian Pendidikan;
 - Kementerian Komunikasi dan Multimedia;
 - Kementerian Dalam Negeri; dan
 - termasuk Kerajaan Negeri.

Mesyuarat ini dilakukan seminggu sekali dan dengan tindakan bersepadu dari pelbagai kementerian dan agensi pencegahan dan kawalan denggi, diharapkan kejadian kes denggi yang melanda negara ketika ini akan dapat diatasi dengan kadar segera.

- ii. Memobilisasikan anggota kesihatan untuk membantu kawasan bermasalah denggi.
- iii. Meningkatkan kempen kesedaran denggi melalui pelbagai media massa samada di television, akhbar tempatan dan radio termasuk media sosial seperti facebook.

- iv. Mengaktifkan Jawatankuasa Mengenai Denggi Peringkat Kebangsaan yang dipengerusikan oleh YAB Timbalan Perdana Menteri dan satu mesyuarat akan diadakan pada bulan Mac ini.

- v. Melaksanakan kaedah semburan baru iaitu Outdoor Residual Spray (ORS) untuk membunuh nyamuk Aedes dewasa di empat daerah bermasalah denggi terutama di Selangor iaitu di Hulu Langat, Petaling, Klang dan Gombak. ORS telah dimulakan pada 11 Februari 2015 dan pemantaun berterusan dilakukan serta penilaian keberkesanan semburan akan dibuat selepas tiga bulan dilaksanakan.

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : BERTULIS

DARIPADA : Y.B. TUAN FONG KUI LUN
[BUKIT BINTANG]

SOALAN :-

Y.B. TUAN FONG KUI LUN [BUKIT BINTANG] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan sebab-sebab sebenar Pilihan Raya Kerajaan Tempatan tidak wajar dilaksanakan di Malaysia selain daripada halangan Perlembagaan Persekutuan sedangkan majoriti rakyat berkehendakkannya.

JAWAPAN :-

Tuan Yang di-Pertua,

Untuk makluman Ahli Yang Berhormat, sekiranya pilihan raya kerajaan tempatan diadakan maka tumpuan Datuk Bandar/ Yang Dipertua (YDP) serta Ahli Majlis akan lebih menjurus kepada hal-hal yang berkaitan dengan urusan pilihan raya. Urusan ini bukan sahaja melibatkan masa dan kos malah tenaga kerja di samping kemungkinan wujudnya unsur-unsur kurang sihat oleh pihak-pihak tertentu yang berteraskan kepentingan masing-masing. Kepimpinan Pihak Berkuasa Tempatan (PBT) yang sentiasa berubah-ubah juga akan menjejaskan kelancaran pelaksanaan dasar dan program penambahbaikan yang telah digubal di peringkat pusat yang akhirnya memberi kesan negatif kepada rakyat. Di samping itu juga, tempoh perkhidmatan yang singkat akan menyebabkan Ahli Majlis yang dipilih lebih menumpukan perhatian kepada usaha untuk mengekalkan kedudukan masing-masing dan seterusnya mengabaikan tugas dan tanggungjawab yang sepatutnya mereka laksanakan.

Kepentingan Penduduk Yang Diwakili

Dengan mengambil kira komposisi kaum yang tidak seimbang antara bandar dan luar bandar adalah dikhuatiri pilihan raya kerajaan tempatan akan menyebabkan pengurusan PBT mempunyai Ahli Majlis yang dipilih melalui pilhan raya hanya mewakili kepentingan sesuatu kaum sahaja. Sebagai contohnya, bandar-bandar seperti George Town, Petaling Jaya, Subang Jaya, Kuching dan Ipoh mempunyai majoriti kaum Cina manakala bandar-bandar seperti Alor Star, Kuala Terengganu dan Kota Bahru mempunyai majoriti kaum Melayu. Keadaan ini akan menyebabkan pengurusan PBT bandar-bandar tersebut akan diterajui oleh kaum-kaum tertentu sahaja. Bagi kawasan luar bandar pula, majoriti penduduknya adalah kaum Melayu. Keadaan ini jika dibiarkan wujud akan melebarkan lagi jurang perbezaan perpaduan antara kaum yang sudah pasti akan memberi impak besar kepada keharmonian antara kaum dan kestabilan negara.

Kos Pilihan Raya

Jika pilihan raya kerajaan tempatan hendak dijalankan semula maka Kerajaan perlu mengadakan 3 pilihan raya, iaitu Parlimen, DUN dan juga Kerajaan Tempatan. Pilihanraya Parlimen dan DUN yang telah diadakan

pada 8 Mac 2008 melibatkan perbelanjaan sebanyak RM142,317,172. Oleh itu, kos yang perlu disediakan bagi mengadakan pilihan raya kerajaan tempatan akan meningkatkan lagi kos pengurusan pilihan raya sedangkan peruntukan tersebut boleh digunakan bagi melaksanakan projek-projek pembangunan untuk faedah rakyat. Selain itu, kos-kos tidak langsung bagi mengadakan pilihan raya kerajaan tempatan akan membebankan PBT yang kecil, khususnya yang mengalami defisit perbelanjaan.

Penyertaan Penduduk

Meskipun pilihan raya kerajaan tempatan diamalkan di beberapa negara luar, namun dari segi bilangan pengundi ataupun *turn out* yang datang mengundi adalah sedikit. Dengan mengambil kira *turn out* yang rendah tersebut, keputusan pilihan raya kerajaan tempatan berkenaan tidak menggambarkan kehendak sebenar penduduk setempat. Keadaan yang sama boleh berlaku di negara ini dan oleh itu pilihan raya kerajaan tempatan yang dicadangkan atas alasan untuk memberi peluang kepada penduduk setempat untuk memilih wakil mereka dalam PBT tidak akan tercapai. Tambahan pula dengan kos yang tinggi dibandingkan dengan *turn out* yang rendah, maka pilihan raya kerajaan tempatan dilihat sebagai tidak sesuai ataupun tidak *viable* untuk diadakan.

Selain itu, terdapat juga negara seperti Australia melantik *Chief Executive Officer* (CEO) di kalangan kakitangan PBT yang tugasnya adalah memberikan khidmat nasihat, mengurus sumber manusia dan hasil serta memastikan polisi PBT dilaksanakan dengan betul. Sekiranya pilihan raya kerajaan tempatan dan pelantikan CEO diadakan di negara ini, maka peranan Datuk Bandar / YDP dan Ahli Majlis yang dipilih melalui pilihan raya perlu ditentukan.

Kewujudan Sistem Kerajaan Tempatan Yang Berbeza

Oleh kerana PBT di negeri Sabah dan Sarawak tidak tertakluk kepada Akta Pilihan Raya Kerajaan Tempatan 1960, maka undang-undang bagi membolehkan pilihan raya kerajaan tempatan di kedua-dua negeri berkenaan juga perlu diwujudkan. Sebaliknya jika kedua-dua negeri berkenaan tidak bersetuju untuk mengadakan pilihan raya tersebut, maka akan wujud dua sistem kerajaan tempatan yang berbeza di negara ini. Keadaan ini sudah pasti akan mewujudkan jurang perbezaan yang ketara antara PBT di Semenanjung Malaysia dan Sabah serta Sarawak dari segi pelaksanaan dasar, program dan projek yang berkaitan dengan PBT. Ini sekaligus akan menjejaskan usaha Kerajaan untuk mewujudkan

pembangunan yang seimbang antara wilayah bagi memastikan tiada penduduk yang ketinggalan dalam arus pembangunan negara.

Kementerian Kesejahteraan Bandar,
Perumahan dan Kerajaan Tempatan

April 2015